



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

16.01.2020թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ԱՑ-ՆԳ-2019/191

Հայաստանի Հանրապետության գնումների հետ կապված բողոքներ քննող անձը՝
ի դեմս Գրիգոր Ներսիսյանի

Մասնակցությամբ «Բայազ Էներգոշին» ՍՊԸ-ի ներկայացուցիչ՝ Հ. Ենգոյանի
(լիազորագիր, տրված 13.12.2020թ.)

ուսումնասիրելով Հայաստանի Հանրապետության ֆինանսների նախարարության
02.12.2019թ. թիվ 26/26-1/19965-2019 գրությամբ «Բայազ Էներգոշին» ՍՊԸ-ին գնումների
գործընթացին մասնակցելու իրավունք չունեցող մասնակիցների ցուցակում ներառելու
նպատակով նախաձեռնված ընթացակարգով ներկայացված հիմքերը, պարզեցի
հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, Հայաստանի տարածքային զարգացման
հիմնադրամի 27.11.2019թ. թիվ Ե/01/485-19 գրության հիման վրա, 02.12.2019թ. թիվ 26/26-
1/19965-2019 գրությամբ ՀՀ գնումների հետ կապված բողոքներ քննող մարմնում
նախաձեռնել է «Բայազ Էներգոշին» ՍՊԸ-ին (հետայսու նաև՝ Ընկերություն) գնումների

գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

«Գնումների հետ կապված բողոքներ քննող անձի գործունեության կարգը հաստատելու մասին» ՀՀ ֆինանսների նախարարի 06.12.2018թ. N 600-Ն հրամանի 4.3 կետի համաձայն՝ ՍՑ-ԼՕ-2019/235 ընթացակարգի քննությունը սկսվել է սկզբից:

2. «Բայազ Էներգոշին» ՍՊԸ-ի ներկայացրած փաստարկները և դիրքորոշումը.

«Բայազ Էներգոշին» ՍՊԸ-ն Գնումների հետ կապված բողոքներ քննող անձին ուղղված գրությամբ հայտնել է հետևյալը.

Հայաստանի տարածքային զարգացման հիմնադրամի (հետայսու նաև՝ Պատվիրատու) կարիքների համար հայտարարվել է «ՀԾ-ԳՀ-ԱՇՁԲ-2019/103/104» ծածկագրով գնանշման հարցման ընթացակարգ (հետայսու նաև՝ Ընթացակարգ): Ընթացակարգին, ի թիվս այլ մասնակիցների, հայտ է ներկայացրել նաև «Բայազ Էներգոշին» ՍՊԸ-ն և 2-րդ չափաբաժնի մասով ճանաչվել առաջին տեղ զբաղեցնող մասնակից:

Այնուհետև Ընթացակարգի գնահատող հանձնաժողովի 11.10.2019թ. տեղի ունեցած նիստի թիվ 2 արձանագրության 10 կետի համաձայն՝ որոշում է կայացվել ծանուցել «Բայազ Էներգոշին» ՍՊԸ-ին հրավերով սահմանված կարգով ծանուցումը ստանալուց հետո երեք աշխատանքային օրվա ընթացքում էլեկտրոնային ձևով ներկայացնել հրավերով պահանջվող փաստաթղթերը:

«Բայազ Էներգոշին» ՍՊԸ-ի կողմից հրավերով սահմանված ժամկետներում ներկայացվել են որակավորման փաստաթղթերը, սակայն Ընթացակարգի գնահատող հանձնաժողովի կողմից արձանագրվել են անհամապատասխանություններ /սակայն անհամապատասխանությունը արձանագրող հանձնաժողովի նիստը արձանագրությունը այն պահին չի հրապարակվել www.gnumner.am կայքում/, որի վերաբերյալ «Բայազ Էներգոշին» ՍՊԸ-ին 23.10.2019թ. ուղարկվել է անհամապատասխանությունների շտկման վերաբերյալ ծանուցում, որում մասնավորապես արձանագրվել է. «Ձեր կողմից ուղարկված որակավորման փաստաթղթերում գնահատող հանձնաժողովի կողմից հայտնաբերվել է անհամապատասխանություններ հրավերի պահանջների նկատմամբ, մասնավորապես՝ չի

համապատասխանում հրավերով սահմանված նմանատիպության պայմաններին: Անհրաժեշտ է ներկայացնել Քաղաքաշինության բնագավառում շինարարության իրականացում՝ հիդրոտեխնիկական /նվազագույն՝ 80%/, բնակելի, հասարակական և արտադրական և էներգետիկ լիցենզիաների ներքո կատարված աշխատանքների պայմանագիր՝ նվազագույն 6,360,000 ՀՀ դրամ արժողությամբ:

Անհամապատասխանությունների շտկման ծանուցման մեջ անհասկանալիորեն նշվել է նաև, որ անհամապատասխանությունները կհամարվի շտկված, եթե ներկայացվի կոմիտեի տրամադրված տեղեկատվության մեջ նշված գումարի վճարումը հիմնավորող փաստաթղթի բնօրինակից արտատպված /սկանավորված/ օրինակը»:

Իսկ արդեն Ընթացակարգի գնահատող հանձնաժողովի 15.11.2019թ. տեղի ունեցած գնահատման նիստի թիվ 3 արձանագրության 4.2 կետի համաձայն միաժամանակ արձանագրվել է հետյալը. «Բայագ Էներգոշին» ՍՊԸ-ի կողմից ներկայացված մասնագիտական փորձը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի ավարտին ներկայացված փաստաթղթերը չեն շտկվել և մասնակցի կողմից ներկայացված հայտը գնահատվել է անբավարար և մերժվել:

Ընկերությունը վկայակոչել է ՀՀ Սահմանադրության 86-րդ հոդվածի 1-ին մասի 1-ին կետը, «Գնումների մասին» ՀՀ օրենքի (հետայսու՝ նաև Օրենք) 3-րդ հոդվածի 1-ին և 2-րդ մասերը, 7-րդ հոդվածի 1-ին մասը, 34-րդ հոդվածի 1-ին, 5-րդ և 6-րդ մասերը, ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 26-րդ կետի 9-րդ ենթակետը, Կարգի 47-րդ և 48-րդ կետերը Ընթացակարգի հրավերի 2.5.-րդ կետը, որի համաձայն՝ «Մասնագիտական փորձառություն» որակավորման չափանիշը սահմանվում և գնահատվում է հետևյալ կարգով՝

ա. մասնակիցը պետք է հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրած լինի նմանատիպ առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում կատարված աշխատանքների ծավալը (կամ հանրագումարային ծավալը)՝ գումարային

արտահայտությամբ, պակաս չէ տվյալ սույն ընթացակարգի շրջանակում մասնակցի ներկայացրած գնային առաջարկի հիսունոկոսից: Ընդ որում առնվազն մեկ պայմանագրի շրջանակում կատարված աշխատանքների ծավալը գումարային արտահայտությամբ պետք է պակաս չլինի սույն ընթացակարգի շրջանակում մասնակցի ներկայացրած գնային առաջարկի քսան տոկոսից:

Չափաբաժին 1

Սույն ընթացակարգի իմաստով նմանատիպ են համարվում. Քաղաքաշինության բնագավառում շինարարության իրականացում՝ հիդրոտեխնիկական լիցենզիաների ներքո աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները:

Չափաբաժին 2

Սույն ընթացակարգի իմաստով նմանատիպ են համարվում. Քաղաքաշինության բնագավառում շինարարության իրականացում՝ հիդրոտեխնիկական (նվազագույնը՝ 80%), բնակելի, հասարակական և արտադրական և էներգետիկ լիցենզիաների ներքո աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները:

Ճանապարհաշինարարական աշխատանքների, ներառյալ դրանց իրականացման համար անհրաժեշտ նախագծային փաստաթղթերի մշակման գնումների դեպքում տնտեսական գործունեության խմբերը սահմանվում են հաշվի առնելով գնման առարկայի տեսակը):

բ. սույն ենթակետի ա) պարբերությամբ նախատեսված պահանջներին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, պայմանով, որ առաջին տեղը զբաղեցրած մասնակից ճանաչվելու դեպքում սույն հրավերով սահմանված կարգով և ժամկետներում հանձնաժողովին կներկայացնի նախկինում կատարած պայմանագրի (պայմանագրերի, համաձայնագրերի) պատճենները, իսկ այդ պայմանագրի (պայմանագրերի, համաձայնագրերի) պատշաճ կատարումը գնահատելու համար՝ տվյալ պայմանագրի

(համաձայնագրի) կողմերի հաստատած՝ պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Ընդ որում՝ գնահատող հանձնաժողովը կարող է առաջին տեղը զբաղեցրած մասնակցի կողմից ներկայացված պայմանագրի (համաձայնագրի) կատարված լինելու իսկությունը ստուգել Հայաստանի Հանրապետության պետական եկամուտների կոմիտեի միջոցով:

գ. մասնակցի որակավորումը այս չափանիշի գծով գնահատվում է բավարար, եթե վերջինս ապահովում է սույն ենթակետով նախատեսված պայմաններն ու պահանջները:

«Բայազ Էներգոշին» ՍՊԸ-ի կողմից հրավերով սահմանված ժամկետներում՝ 16.10.2019թ. «Բայազ Էներգոշին» ՍՊԸ-ին պատկանող hshake@mail.ru էլեկտրոնային հասցեից Պատվիրատուի i.osipyam@atdf.am էլեկտրոնային հասցեին /արտատպումը կցվում է/ ներկայացվել են որակավորման փաստաթղթերը, սակայն Ընթացակարգի գնահատող հանձնաժողովի կողմից ներկայացված փաստաթղթերում արձանագրվել են անհամապատասխանություններ:

Ընթացակարգի գնահատող հանձնաժողովը էլեկտրոնային եղանակով «Բայազ Էներգոշին» ՍՊԸ-ին 23.10.2019թ. ուղարկված ծանուցմամբ արձանագրել է հետևյալը. «Ձեր կողմից ուղարկված որակավորման փաստաթղթերում գնահատող հանձնաժողովի կողմից հայտնաբերվել է անհամապատասխանություններ հրավերի պահանջների նկատմամբ, մասնավորապես՝ չի համապատասխանում հրավերով սահմանված նմանատիպության պայմաններին: Անհրաժեշտ է ներկայացնել Քաղաքաշինության բնագավառում շինարարության իրականացում՝ հիդրոտեխնիկական /նվազագույն՝ 80%, բնակելի, հասարակական և արտադրական և էներգետիկ լիցենզիաների ներքո կատարված աշխատանքների պայմանագիր՝ նվազագույն 6,360,000 ՀՀ դրամ արժողությամբ:

Անհամապատասխանությունների շտկման ծանուցման մեջ անհասկանալիորեն նշվել է նաև, որ անհամապատասխանությունները կհամարվի շտկված, եթե ներկայացվի կոմիտեի տրամադրված տեղեկատվության մեջ նշված գումարի վճարումը հիմնավորող փաստաթղթի բնօրինակից արտատպված /սկանավորված/ օրինակը»:

Ընկերության կողմից սահմանված ժամկետում և կարգով «Բայազ Էներգոշին» ՍՊԸ-ին պատկանող hshake@mail.ru էլեկտրոնային հասցեից Պատվիրատուի i.osipyam@atdf.am էլեկտրոնային հասցեին /արտատպումը կցվում է/ 25.12.2019թ. ներկայացվել են շտկված որակավորման փաստաթղթերը: Մասնավորապես, «Բայազ Էներգոշին» ՍՊԸ-ի կողմից ներկայացվել են հետևյալ փաստաթղթերը.

1.«Բայազ Էներգոշին» ՍՊԸ-ի և «Մ-Գրուպ Էներգոսերվիս» ՍՊԸ-ի միջև 05.12.2018թ. կնքված խորքային պոմպերի տեղադրման և մոնիտաժման կապալային աշխատանքերի կատարման պայմանագիր: Պայմանագրի գինը կազմել է 7 532 000 ՀՀ դրամ:

2. Պայմանագրի կողմերի միջև 28.03.2019թ. ստորագրված գնման ակտ:

3. Պայմանագրի կողմերի միջև 28.03.2019թ. ստորագրված կատարողական /հանձնման-ընդունման/ ակտ:

Այնուհետև, նման շտկում կատարելու արդյունքում, Պատվիրատուն, այնուամենայնիվ 15.11.2019թ. տեղի ունեցած գնահատման նիստի թիվ 3 արձանագրության 4.2 կետի համաձայն միաժամանակ արձանագրել է հետյալը. «Բայազ Էներգոշին» ՍՊԸ-ի կողմից ներկայացված մասնագիտական փորձը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի ավարտին ներկայացված փաստաթղթերը չեն շտկվել և մասնակցի կողմից ներկայացված հայտը գնահատվել է անբավարար և մերժվել:

Ընկերությունը գտնում է, որ «ՀԾ-ԳՀ-ԱՇՁԲ-2019/103/104» ծածկագրով գնանշման հարցման Ընթացակարգի գնահատող հանձնաժողովը սույն ընթացակարգի շրջանակներում թույլ է տվել գնումների մասին ՀՀ օրենսդրության մի շարք պահանջների խախտում: Մասնավորապես.

- Ընթացակարգի գնահատող հանձնաժողովն էլեկտրոնային եղանակով «Բայազ Էներգոշին» ՍՊԸ-ին 23.10.2019թ. ուղարկված ծանուցմամբ արձանագրել է հետևյալը. «Ձեր կողմից ուղարկված որակավորման փաստաթղթերում գնահատող հանձնաժողովի կողմից հայտնաբերվել է անհամապատասխանություններ հրավերի պահանջների նկատմամբ, մասնավորապես՝ չի համապատասխանում հրավերով սահմանված նմանատիպության պայմաններին: Անհրաժեշտ է ներկայացնել Քաղաքաշինության բնագավառում շինարարության իրականացում՝ հիդրոտեխնիկական /նվազագույն՝ 80%/,

բնակելի, հասարակական և արտադրական և էներգետիկ լիցենզիաների ներքո կատարված աշխատանքների պայմանագիր՝ նվազագույն 6,360,000 ՀՀ դրամ արժողությամբ: Նույն ծանուցմամբ անհասկանալիորեն միաժամանակ նշվել է, որ անհամապատասխանությունները կհամարվի շտկված, եթե ներկայացվի կոմիտեի տրամադրված տեղեկատվության մեջ նշված գումարի վճարումը հիմնավորող փաստաթղթի բնօրինակից արտատպված /սկանավորված/ օրինակը»:

Վերոնշյալ ծանուցման ուսումնասիրությունից այդպես էլ անհասկանալի է մնում, թե գնահատող հանձնաժողովի կողմից հրավերի պահանջների նկատմամբ կոնկրետ ինչ անհամապատասխանություններ են արձանագրվել /դրանք մանրամասն չեն արձանագրվել, ինչպես պահանջում է գնումների մասին ՀՀ օրենսդրությունը/ և, ընդհանրապես, հստակ ինչը պետք է շտկեր «Բայազ էներգոշին» ՍՊԸ-ն: Ավելին, ինչ Կոմիտեի կողմից տրամադրվելիք տեղեկատվության մասին է խոսքը, քանի որ ՍՊԸ-ն հայտը ներկայացնելու օրվա դրությամբ չի ունեցել ոչ ժամկետանց հարկային պարտավորություն, ոչ էլ նախորդող երեք տարիների համախառն եկամտի մասով անհամապատասխանություն, այսինքն ակնհայտ է, որ այս մասով Ընթացակարգի գնահատող հանձնաժողովի կայացրած որոշումը հիմնավորված չէ, կանկախատեսելի և հասկանալի չէ ՍՊԸ-ի համար, ինչպես դա պահանջում է Կարգի 26-րդ կետի 9-րդ ենթակետը, 46-րդ և 47-րդ կետերը: Այնուամենայնիվ, Ընկերության կողմից սահմանված ժամկետում և կարգով շտկվել են անհամապատասխանությունները այն մասով, որը որ հասկանալի և ընկալելի էր ՍՊԸ-ի համար:

Վերոհիշյալի արդյունքում ակնհայտորեն խախտվել է իրավական որոշակիության և կանխատեսելիության սահմանադրական սկզբունքները (այդ մասին ավելի մանրամասն տե՛ս՝ ՀՀ Սահմանադրական դատարանի 18.04.2006թ. թիվ ՍԴՌ-630, 15.01.2008թ. թիվ ՍԴՌ-723 և 29.01.2008թ. թիվ ՍԴՌ-731 որոշումները), քանի որ Ընկերության համար նման բովանդակությամբ ծանուցում ստանալիս՝ անհասկանալի է եղել, թե կոնկրետ ինչ անհամապատասխանություններ են արձանագրվել հրավերի պահանջների նկատմամբ և հստակ ինչ պետք է շտկեր մասնակիցների կողմից:

- Նույն անորոշությունը և անկանխատեսելիությունը պարունակում է նաև գնահատող հանձնաժողովի ՍՊԸ-ի հայտը մերժելու մասին որոշումը: Մասնավորապես, 15.11.2019թ.

տեղի ունեցած գնահատման նիստի թիվ 3 արձանագրության 4.2 կետի համաձայն արձանագրվել է ընդամենը հետյալը. «Բայազ Էներգոշին» ՍՊԸ-ի կողմից ներկայացված մասնագիտական փորձը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի ավարտին ներկայացված փաստաթղթերը չեն շտկվել և մասնակցի կողմից ներկայացված հայտը գնահատվել է անբավարար և մերժվել: Վերոնշյալ արձանագրության ուսումնասիրությունից այդպես էլ անհասկանալի է մնում, թե գնահատող հանձնաժողովի կողմից հրավերի պահանջների նկատմամբ կոնկրետ ինչ անհամապատասխանություններ են արձանագրվել, ինչու ներկայացված շտկված փաստաթղթերը գնահատվել են անբավարար և և կոնկրետ ինչ հիմքով է մերժվել ՍՊԸ-ի հայտը /դրանք մանրամասն չեն արձանագրվել, ինչպես պահանջում է գնումների մասին ՀՀ օրենսդրությունը/:

- Շտկման արդյունքում հասցեից Պատվիրատուի i.osipyan@atdf.am էլեկտրոնային հասցեին /արտատպումը կցվում է/ 25.12.2019թ. ներկայացված շտկված որակավորման փաստաթղթերի ուսումնասիրությունը վկայում է, որ դրանք լիովին համապատասխանում են ընթացակարգի հրավերի 2.5 կետով սահմանված պահանջներին: Նախ, նշված պայմանագրով նախատեսված կապալային աշխատանքները կատարվում են: Մասնավորապես, «Բայազ Էներգոշին» ՍՊԸ-ի կողմից ներկայացվել են հետևյալ փաստաթղթերը.

- 1.«Բայազ Էներգոշին» ՍՊԸ-ի և «Մ-Գրուպ Էներգոսերվիս» ՍՊԸ-ի միջև 05.12.2018թ. կնքված խորքային պոմպերի տեղադրման և մոնտաժման կապալային աշխատանքերի կատարման պայմանագիր: Պայմանագրի գինը կազմել է 7 532 000 ՀՀ դրամ:

2. Պայմանագրի կողմերի միջև 28.03.2019թ. ստորագրված գնման ակտ:

3. Պայմանագրի կողմերի միջև 28.03.2019թ. ստորագրված կատարողական /հանձնման-ընդունման/ ակտ:

Սակայն անհասկանալիորեն, առանց համապատասխան հիմնավորման, ներկայացված շտկված փաստաթղթերը գնահատվել են որպես չշտկված փաստաթղթեր, և ՍՊԸ-ի համար ոչ կանխատեսելի հիմքով ընդամենն արձանագրվել է, որ շտկման համար սահմանված ժամկետի ավարտին ներկայացված փաստաթղթերը չեն շտկվել և մասնակցի կողմից ներկայացված հայտը գնահատվել է անբավարար և մերժվել:

Արդյունքում նման ոչ իրավաչափ եղանակով Ընկերության հայտը մերժելը նաև ոչ իրավաչափորեն հանգեցրել է «Բայազ Էներգոշին» ՍՊԸ-ի մասով գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով պաշտոնական ընթացակարգ նախաձեռնելուն և կանգնեցրել Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառվելու վտանգի առջև:

Ելնելով վերոգրյալից՝ Ընկերությունը խնդրել է «Բայազ Էներգոշին» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված գնման գործընթացի շրջանակներում ստանձնած պարտավորության խախտում, և վերջինիսի չներառել գնումների գործընթացին մասնակցելու իրավունք չունեցող մասնակիցների ցուցակում:

«Բայազ Էներգոշին» ՍՊԸ-ն, պատշաճ ծանուցված լինելով ՍՑ-ՆԳ-2019/191 ընթացակարգի շրջանակներում 16.01.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով պնդել է վերոհիշյալ գրությամբ ներկայացված դիրքորոշումը:

3. Հայաստանի տարածքային զարգացման հիմնադրամի կողմից ներկայացված փաստարկները և դիրքորոշումը.

Հայաստանի տարածքային զարգացման հիմնադրամը ՀՀ ֆինանսների նախարարությանն ուղղված 27.11.2019թ. թիվ Ե/01/485-19 գրությամբ հայտնել է, որ Հայաստանի տարածքային զարգացման հիմնադրամի կողմից 2019 թվականի հոկտեմբերի 1-ին հրապարակվել է «ՀԾ-ԳՀ-ԱՇՁԲ-2019/103/104» ծածկագրով ընթացակարգի հրավերը, որի հայտերի բացումը տեղի է ունեցել 2019 թվականի հոկտեմբերի 8-ին: Հայտերի բացման նիստի արդյունքում ընթացակարգի 2-րդ չափաբաժնի մասով 1-ին տեղ է զբաղեցրել «Բայազ Էներգոշին» ՍՊԸ-ն:

«Բայազ Էներգոշին» ՍՊԸ-ին հրավերով սահմանված կարգով 2019 թվականի հոկտեմբերի 11-ին ուղարկվել է որակավորման փաստաթղթեր ներկայացնելու ծանուցում, որի կողմից վերոնշյալ փաստաթղթերը ներկայացվել են սահմանված ժամկետում:

Սակայն, «Մասնագիտական փորձառություն» չափանիշի մասով ներկայացված պայմանագրերը գնահատվել են հրավերով սահմանված պահանջներին ոչ համապատասխան, և «Բայազ Էներգոշին» ՍՊԸ-ին տրվել է 3 աշխատանքային օր անհամապատասխանությունը շտկելու համար: Սահմանված ժամկետում փաստաթղթերը չեն շտկվել, և «Բայազ Էներգոշին» ՍՊԸ-ի կողմից ներկայացված հայտը գնահատվել է անբավարար և մերժվել:

Պատվիրատուն, պատշաճ ծանուցված լինելով ՍՑ-ՆԳ-2019/191 ընթացակարգի շրջանակներում 16.01.2020թ. ժամը 10:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2019/191 ընթացակարգի քննության համար էական նշանակություն ունեցող փաստերը.

ՍՑ-ՆԳ-2019/191 ընթացակարգի քննության համար էական նշանակություն ունեն հետևյալ փաստերը.

1. Հայաստանի տարածքային զարգացման հիմնադրամի կողմից իր կարիքների համար հայտարարվել է «ՀԾ-ԳՀ-ԱՇՁԲ-2019/103/104» ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Բայազ Էներգոշին» ՍՊԸ-ն:

2. Ընթացակարգի գնահատող հանձնաժողովի 11.10.2019թ. նիստի թիվ 2 արձանագրությամբ կայացված որոշմամբ՝ «Բայազ Էներգոշին» ՍՊԸ-ն Ընթացակարգի 2-րդ չափաբաժնի մասով ճանաչվել է առաջին տեղ զբաղեցրած մասնակից, որին ծանուցվել է հրավերով նախատեսված փաստաթղթերը ներկայացնելու անհրաժեշտության վերաբերյալ:

3. Ընթացակարգի գնահատող հանձնաժողովի 15.11.2019թ. նիստի թիվ 3 արձանագրության համաձայն՝ «Բայազ Էներգոշին» ՍՊԸ-ի կողմից ներկայացված մասնագիտական փորձառությունը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի

ավարտին ներկայացված փաստաթղթերը չեն շտկվել և Ընկերության կողմից ներկայացված հայտը գնահատվել է անբավարար և մերժվել:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ՝ Գրիգոր Ներսիսյանս, ուսումնասիրելով ՀՀ ֆինանսների նախարարության 02.12.2019թ. թիվ 26/26-1/19965-2019 գրությունը, Հայաստանի տարածքային զարգացման հիմնադրամի 27.11.2019թ. թիվ Ե/01/485-19 գրությունը և կից փաստաթղթերը, «Բայազ Էներգոջին» ՍՊԸ-ի դիրքորոշումը, հայտնում եմ հետևյալը.

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց

հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 20-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու և (կամ) որակավորման չափանիշները բավարարելու մասին հայտով ներկայացված հայտարարությունները որակվում են որպես իրականությանը չհամապատասխանող կամ մասնակիցը կամ առաջին տեղ զբաղեցրած մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում՝ բացառությամբ մասնակցի կողմից գնային առաջարկի և հայտի ապահովման ներկայացման դեպքերի:

Կարգի 43-րդ կետի 4-րդ ենթակետի համաձայն՝ հայտերի բացման նիստի ավարտից հետո ոչ ուշ քան հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով ծանուցում է առաջին տեղն զբաղեցրած մասնակցին՝ առաջարկելով ծանուցումն ուղարկելու օրվանից երեք աշխատանքային օրվա ընթացքում էլեկտրոնային փոստի միջոցով ներկայացնել որակավորման չափանիշները հիմնավորող՝ հրավերով նախատեսված փաստաթղթերը, բացառությամբ սույն կարգով նախատեսված դեպքերի, ապրանքների գնման դեպքում նաև սույն կարգի 32-րդ կետի 1-ին ենթակետի «գ» պարբերությամբ նախատեսված փաստաթուղթը, իսկ բանկային երաշխիքի ձևով ներկայացված հայտի ապահովման բնօրինակը՝ կից գրությամբ:

Կարգի 46-րդ կետի համաձայն՝ սույն կարգի 43-րդ կետի 4-րդ ենթակետով նախատեսված ժամկետի ավարտին հաջորդող աշխատանքային օրը քարտուղարն էլեկտրոնային եղանակով հանձնաժողովի անդամներին միաժամանակ տրամադրում է առաջին տեղն զբաղեցրած մասնակցի կողմից ներկայացված փաստաթղթերի պատճենները, գնահատման թերթիկների երկուական օրինակ և կոմիտեից ստացված տեղեկատվությունը: Հայտերի գնահատման արդյունքների հաստատման նիստը

հրավիրվում է սույն կարգի 32-րդ կետի 22-րդ ենթակետով սահմանված ժամկետներում: Ընդ որում, ապրանքների գնման դեպքում հանձնաժողովը գնահատում է նաև ներկայացված տեխնիկական բնութագրերի համապատասխանությունը հրավերի պահանջներին, իսկ անհամապատասխանություն արձանագրելու դեպքում հանձնաժողովի նիստի արձանագրության մեջ մանրամասն նկարագրվում են հայտնաբերված անհամապատասխանությունները:

Կարգի 47-րդ կետի համաձայն՝ առաջին տեղն զբաղեցրած մասնակցի կողմից փաստաթղթեր չներկայացվելու կամ ամբողջական չներկայացվելու կամ ներկայացված փաստաթղթերում հրավերի պահանջների նկատմամբ անհամապատասխանություններ, ներառյալ կոմիտեի տրամադրած տեղեկատվության հիման վրա, իսկ ապրանքների գնման դեպքում՝ նաև սույն կարգի 32-րդ կետի 1-ին ենթակետի «զ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով երեք աշխատանքային օրվա ընթացքում շտկել անհամապատասխանությունը: Ընդ որում, եթե անհամապատասխանությունն արձանագրվել է կոմիտեից ստացված տեղեկատվության արդյունքում, ապա սույն կետում նշված ծանուցմանը կցվում է նաև այդ տեղեկատվությունը պարունակող փաստաթղթի բնօրինակից արտատպված (սկանավորված) տարբերակը:

Կարգի 48-րդ կետի համաձայն՝ առաջին տեղն զբաղեցրած մասնակցի կողմից արձանագրված անհամապատասխանությունը սահմանված ժամկետում՝

1) շտկելու դեպքում հայտը գնահատվում է բավարար, և առաջին տեղն զբաղեցրած մասնակիցը հայտարարվում է ընտրված մասնակից:

2) չշտկելու դեպքում հանձնաժողովի որոշմամբ հայտը մերժվում է, և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Կարգի 61-րդ կետի 1-ին, 2-րդ և 4-րդ կետերի համաձայն՝ մասնակիցների՝ օրենքի 6-րդ հոդվածի 3-րդ մասի 2-րդ կետով նախատեսված՝ «Մասնագիտական փորձառություն» չափանիշը գնահատվում է հետևյալ կարգով

1) հրավերով պահանջվում է, որ մասնակիցը հայտով ներկայացնի հայտարարություն այն մասին, որ հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրել է համանման (նմանատիպ) առնվազն մեկ պայմանագիր, պայմանով, որ գնահատող հանձնաժողովը կարող է սույն կետի 2-րդ ենթակետի հիման վրա ներկայացված պայմանագրի (համաձայնագրերի, պայմանագրերի) կատարված լինելու իսկությունը ստուգել կոմիտեի միջոցով: Նախկինում կատարված պայմանագիրը (պայմանագրերը) գնահատվում է (գնահատվում են) նմանատիպ, եթե դրա (դրանց) շրջանակում մատակարարված ապրանքների, մատուցված ծառայությունների և կատարված աշխատանքների ծավալը (հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակում մասնակցի ներկայացրած գնային առաջարկի հիսուն, իսկ ճանապարհաշինարարական աշխատանքների դեպքում՝ յոթանասուն տոկոսից: Ընդ որում, առնվազն մեկ պայմանագրի շրջանակում մատակարարված ապրանքների, մատուցված ծառայությունների և կատարված աշխատանքների ծավալը գումարային արտահայտությամբ չպետք է պակաս լինի տվյալ գնման ընթացակարգի շրջանակում մասնակցի ներկայացրած գնային առաջարկի քսան, իսկ ճանապարհաշինարարական աշխատանքների դեպքում՝ երեսունհինգ տոկոսից:

2) առաջին տեղն զբաղեցրած մասնակիցը, որպես սույն կետի 1-ին ենթակետով սահմանված որակավորման չափանիշը հիմնավորող փաստաթուղթ, ներկայացնում է նախկինում կատարած պայմանագրի (համաձայնագրերի, պայմանագրերի) պատճենները, իսկ դրանց պատշաճ կատարումը գնահատելու համար՝ տվյալ պայմանագրի կողմերի հաստատած, պայմանագրի (համաձայնագրի)՝ սահմանված ժամկետում կատարումը հավաստող ակտի (հանձնման-ընդունման արձանագրություն կամ պայմանագրով նախատեսված փաստաթուղթ) պատճենը կամ տվյալ պայմանագրի կատարումն ընդունած կողմի գրավոր հավաստումը:

3)

4) մասնակցի որակավորումը գնահատվում է բավարար, եթե վերջինս ապահովում է սույն կետով նախատեսված պահանջները:

Հայաստանի տարածքային զարգացման հիմնադրամի կողմից իր կարիքների համար ՀՀ Արմավիրի մարզ Վանանդ համայնքի ոռոգման ներտնտեսային ցանցի վերանորոգում», «ՀՀ Արմավիրի մարզ Ալաշկերտի էսորքային հորի վերականգնում՝ ոռոգման նպատակով» աշխատանքների ձեռքբերման նպատակով հայտարարվել է «ՀԾ-ԳՀ-ԱՇՁԲ-2019/103/104» ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Բայազ Էներգոշին» ՍՊԸ-ն:

Ընթացակարգի գնահատող հանձնաժողովի 11.10.2019թ. նիստի թիվ 2 արձանագրությամբ կայացված որոշմամբ՝ «Բայազ Էներգոշին» ՍՊԸ-ն Ընթացակարգի 2-րդ չափաբաժնի մասով ճանաչվել է առաջին տեղ զբաղեցրած մասնակից, որին ծանուցվել է հրավերով նախատեսված փաստաթղթերը ներկայացնելու անհրաժեշտության վերաբերյալ:

Ընթացակարգի հրավերով 2-րդ չափաբաժնի համար նախատեսվել է հիդրոտեխնիկական, բնակելի, հասարակական և արտադրական, էներգետիկ լիցենզիայի պահանջ:

Ընթացակարգի հրավերի ՄԱՍ II-ի 3-րդ կետի 3.1 ենթակետի 1-ին պարբերությամբ սահմանվել է, որ հրավերով նախատեսված որակավորման չափանիշներին իր համապատասխանությունը հիմնավորելու համար առաջին տեղ զբաղեցրած մասնակիցը հանձնաժողովի քարտուղարի՝ սույն հրավերով նախատեսված էլեկտրոնային փոստին ուղարկելու միջոցով, հանձնաժողովին է ներկայացնում սույն հրավերի 3-րդ հավելվածով նախատեսված գրությունը, որին կցվում են հայտը ներկայացնելու տարվա և դրան նախորդող երեք տարվա ընթացքում, պատշաճ ձևով իրականացրած համանման (նմանատիպ) առնվազն մեկ պայմանագրի պատճենները, ինչպես նաև այդ պայմանագրի (պայմանագրերի, համաձայնագրերի) սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենները կամ տվյալ պայմանագրի կատարումն ընդունած կողմի գրավոր հավաստման բնօրինակից արտատպված (սկանավորված) տարբերակը:

Նույն հրավերով սահմանվել է, որ մասնակցին ներկայացվող՝ «Մասնագիտական փորձառություն» որակավորման չափանիշը սահմանվում և գնահատվում է հետևյալ կարգով՝

ա. մասնակիցը պետք է հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրած լինի նմանատիպ առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ սույն ընթացակարգի շրջանակում մասնակցի ներկայացրած գնային առաջարկի հիսուն տոկոսից: Ընդ որում առնվազն մեկ պայմանագրի շրջանակում կատարված աշխատանքների ծավալը գումարային արտահայտությամբ պետք է պակաս չլինի սույն ընթացակարգի շրջանակում մասնակցի ներկայացրած գնային առաջարկի քսան տոկոսից:

Ընդ որում՝ չափաբաժին 2-ի համար Ընթացակարգի իմաստով նմանատիպ են համարվում. քաղաքաշինության բնագավառում շինարարության իրականացում՝ հիդրոտեխնիկական (նվազագույնը՝ 80%), բնակելի, հասարակական և արտադրական և էներգետիկ լիցենզիաների ներքո աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները:

Ճանապարհաշինարարական աշխատանքների, ներառյալ դրանց իրականացման համար անհրաժեշտ նախագծային փաստաթղթերի մշակման գնումների դեպքում տնտեսական գործունեության խմբերը սահմանվում են հաշվի առնելով գնման առարկայի տեսակը):

բ. սույն ենթակետի ա) պարբերությամբ նախատեսված պահանջներին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, պայմանով, որ առաջին տեղը զբաղեցրած մասնակից ճանաչվելու դեպքում սույն հրավերով սահմանված կարգով և ժամկետներում հանձնաժողովին կներկայացնի նախկինում կատարած պայմանագրի (պայմանագրերի, համաձայնագրերի) պատճենները, իսկ այդ պայմանագրի (պայմանագրերի, համաձայնագրերի) պատշաճ կատարումը գնահատելու համար՝ տվյալ պայմանագրի (համաձայնագրի) կողմերի հաստատած՝ պայմանագրի սահմանված ժամկետում

կատարումը հավաստող ակտի (հանձման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Ընթացակարգի գնահատող հանձնաժողովի 15.11.2019թ. նիստի թիվ 3 արձանագրության համաձայն՝ «Բայազ Էներգոշին» ՍՊԸ-ի կողմից ներկայացված մասնագիտական փորձառությունը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի ավարտին ներկայացված փաստաթղթերը չեն շտկվել և Ընկերության կողմից ներկայացված հայտը գնահատվել է անբավարար և մերժվել:

Այսպիսով՝ համաձայն գործում առկա նյութերի «Բայազ Էներգոշին» ՍՊԸ-ն «Մասնագիտական փորձառություն» որակավորման չափանիշը հիմնավորելու համար Ընթացակարգի գնահատող հանձնաժողովին ներկայացրել է Ընկերության և «Արմավիր» ԶՕԸ-ի միջև 26.03.2018թ. կնքված 15 000 000 ՀՀ դրամ ընդհանուր արժողությամբ էլ. շարժիչների, խորքային պոմպերի և տրանսֆորմատորների վերանորոգման աշխատանքների կատարման N 1 պայմանագիրը, «Սարդարապատ համայնքապետարան» ՀԿԿ-ի և «Բայազ Էներգոշին» ՍՊԸ-ի միջև 12.02.2018թ. կնքված 968 400 ՀՀ դրամ ընդհանուր արժողությամբ էլ. շարժիչների, խորքային պոմպերի և տրանսֆորմատորների վերանորոգման աշխատանքների կատարման N 1 պայմանագիրը:

«Բայազ Էներգոշին» ՍՊԸ-ին ուղղված 23.10.2019թ. ծանուցմամբ հանձնաժողովի քարտուղարը հայտնել է, որ Ընկերության կողմից ուղարկված որակավորման փաստաթղթերում գնահատող հանձնաժողովի կողմից հայտնաբերվել է անհամապատասխանություն հրավերի պահանջների նկատմամբ:

Մասնավորապես, Ընկերության կողմից ներկայացված նմանատիպ պայմանագրի բովանդակությունը չի համապատասխանում հրավերով սահմանված նմանատիպության պայմաններին: Անհրաժեշտ է ներկայացնել քաղաքաշինության բնագավառում շինարարության իրականացում՝ հիդրոտեխնիկական (նվազագույնը՝ 80%), բնակելի, հասարակական և արտադրական և էներգետիկ լիցենզիաների ներքո կատարված աշխատանքների պայմանագիր՝ նվազագույնը 6 360 000 ՀՀ դրամ արժողությամբ:

Համաձայն գործում առկա նյութերի՝ Ընկերության կողմից որպես շտկում գնահատող հանձնաժողովին ներկայացվել է Ընկերության և «Մ-Գրուպ Էներգոսերվիս» ՓԲԸ-ի միջև

05.12.2018թ. կնքված 7 532 000 ՀՀ դրամ ընդհանուր արժողությամբ խորքային պոմպերի և տրանսֆորմատորների վերանորոգման աշխատանքների կատարման N 1 պայմանագիրը:

Ընթացակարգի գնահատող հանձնաժողովի 15.11.2019թ. նիստի թիվ 3 արձանագրության համաձայն՝ «Բայազ Էներգոշին» ՍՊԸ-ի կողմից ներկայացված մասնագիտական փորձառությունը հիմնավորող փաստաթղթերը ներկայացվել են հրավերի պահանջներին անհամապատասխան, շտկման համար սահմանված ժամկետի ավարտին ներկայացված փաստաթղթերը չեն շտկվել և Ընկերության կողմից ներկայացված հայտը գնահատվել է անբավարար և մերժվել:

Այսպիսով՝ Ընթացակարգի հրավերով սահմանվել է «Մասնագիտական փորձառություն» որակավորման չափանիշի պահանջը, ինչպես նաև այն գնահատելու կարգը: Մասնավորապես 2-րդ չափաբաժնի համար Ընթացակարգի իմաստով նմանատիպ են համարվել քաղաքաշինության բնագավառում շինարարության իրականացում՝ հիդրոտեխնիկական (նվազագույնը՝ 80%), բնակելի, հասարակական և արտադրական և էներգետիկ լիցենզիաների ներքո աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները:

«Բայազ Էներգոշին» ՍՊԸ-ի՝ որպես Ընթացակարգի 2-րդ չափաբաժնի մասով 1-ին տեղ զբաղեցրած մասնակցի կողմից «Մասնագիտական փորձառություն» որակավորման չափանիշը հիմնավորելու համար ներկայացվել են համապատասխան պայմանագրեր, որոնցում, համաձայն Ընկերությանն ուղարկված 23.10.2019թ ծանուցման, արձանագրվել է անհամապատասխանություն: Միևնույն ժամանակ, ուսումնասիրելով Ընկերությանն ուղղված ծանուցումը, գտնում են, որ նշված ծանուցումը՝ անհամապատասխանությունների արձանագրման վերաբերյալ հստակ չէ և դրանում հստակ չի նկարագրվել Ընկերության կողմից ներկայացված փաստաթղթերում արձանագրված անհամապատասխանությունը: Մասնավորապես, ծանուցման մեջ ընդամենը նշվել է, որ Ընկերության կողմից ներկայացված նմանատիպ պայմանագրի բովանդակությունը չի համապատասխանում հրավերով սահմանված նմանատիպության պայմաններին և անհրաժեշտ է ներկայացնել

հրավերով սահմանված քաղաքաշինության բնագավառում շինարարության իրականացում՝ հիդրոտեխնիկական (նվազագույնը՝ 80%), բնակելի, հասարակական և արտադրական և էներգետիկ լիցենզիաների ներքո կատարված աշխատանքների պայմանագիր՝ նվազագույնը 6 360 000 ՀՀ դրամ արժողությամբ: Մինչդեռ չի մատնանշվել, թե Ընկերության կողմից ներկայացված պայմանագիրը որ մասով (հաշվի առնելով նաև հրավերով նախատեսված լիցենզիաների շրջանակներում կատարված աշխատանքների ծավալների տոկոսային հարաբերակցությունը) չի համապատասխանում հրավերով սահմանված նմանատիպ համարվող աշխատանքներին, քանի որ նմանատիպությունը գնահատելու համար հաշվի է առնվում ոչ միայն աշխատանքների ոլորտը, այլև նաև պայմանագրի շրջանակներում կատարված աշխատանքների ծավալը՝ գումարային արտահայտությամբ: Իսկ տվյալ դեպքում ծանուցումից պարզ չէ, թե Ընկերության կողմից ներկայացված պայմանագիրը չի դիտարկվել որպես նմանատիպ կատարված աշխատանքների բնույթը հիմք ընդունելով (քանի որ Կարգի 65-րդ կետը սահմանում է, որ ճանապարհաշինարարական աշխատանքների՝ ներառյալ դրանց իրականացման համար անհրաժեշտ նախագծային փաստաթղթերի մշակման, փորձաքննության և տեխնիկական հսկողության ծառայությունների գնումների դեպքում տնտեսական գործունեության խմբերը սահմանվում են՝ հաշվի առնելով գնման առարկայի տեսակը, իսկ շինարարական ծրագրերի դեպքում՝ հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները), թե դրա շրջանակներում կատարված աշխատանքների՝ հրավերով սահմանված լիցենզիաների շրջանակներում համապատասխան տոկոսային հարաբերակցությամբ իրականացված չլինելու, կամ թե Կարգի 65-րդ կետի 2-րդ ենթակետով նախատեսված փաստաթղթերի՝ հրավերի պահանջներին չհամապատասխանելու հիմքով:

Կարգի 46-րդ կետը սահմանում է, որ նույն կարգի 43-րդ կետի 4-րդ ենթակետով նախատեսված ժամկետի ավարտին հաջորդող աշխատանքային օրը քարտուղարն էլեկտրոնային եղանակով հանձնաժողովի անդամներին միաժամանակ տրամադրում է առաջին տեղն զբաղեցրած մասնակցի կողմից ներկայացված փաստաթղթերի պատճենները, գնահատման թերթիկների երկուական օրինակ և կոմիտեից ստացված տեղեկատվությունը: Հայտերի գնահատման արդյունքների հաստատման նիստը

հրավիրվում է սույն կարգի 32-րդ կետի 22-րդ ենթակետով սահմանված ժամկետներում: Ընդ որում, ապրանքների գնման դեպքում հանձնաժողովը գնահատում է նաև ներկայացված տեխնիկական բնութագրերի համապատասխանությունը հրավերի պահանջներին, իսկ անհամապատասխանություն արձանագրելու դեպքում հանձնաժողովի նիստի արձանագրության մեջ մանրամասն նկարագրվում են հայտնաբերված անհամապատասխանությունները:

Տվյալ դեպքում սահմանելով մասնակցի կողմից ներկայացված փաստաթղթերում արձանագրված անհամապատասխանությունները մանրամասն նկարագրելու պահանջը, գնումների մասին ՀՀ օրենսդրությունը նպատակ է հետապնդում հնարավորություն ընձեռնել մասնակցին հնարավորինս պարզ և հասկանալի ձևով ընկալելու իր կողմից ներկայացված փաստաթղթերում առկա անհամապատասխանությունները, որոնք անհրաժեշտ է շտկել սահմանված ժամկետում:

Տվյալ դեպքում արձանագրում եմ, որ «Բայազ Էներգոշին» ՍՊԸ-ին ուղղված ծանուցման մեջ հստակ չի նկարագրվել Ընկերության կողմից ներկայացված փաստաթղթերում հրավերի պահանջների նկատմամբ արձանագրված անհամապատասխանությունները, այդ թվում նաև՝ նշված անհամապատասխանությունները չեն նշվել Ընկերության կողմից երկրորդ անգամ ներկայացված փաստաթղթերի կապակցությամբ և չեն մատնանշվել նաև Ընկերության հայտը մերժելիս:

Այսպիսով՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի համաձայն՝ մասնակիցը ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է գնման գործընթացի շրջանակում ստանձնած պարտավորությունը, որը հանգեցրել է գնման գործընթացին տվյալ մասնակցի հետագա մասնակցության դադարեցմանը:

Հաշվի առնելով վերոգրյալը՝ գտնում եմ, որ նման պայմաններում հնարավոր չէ արձանագրել «Բայազ Էներգոշին» ՍՊԸ-ի կողմից «ՀԾ-ԳՀ-ԱՇՁԲ-2019/103/104» ծածկագրով գնանշման հարցման ընթացակարգի շրջանակներում Օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված գնման գործընթացի շրջանակում ստանձնած պարտավորության խախտման փաստը, ուստի առկա չեն Ընկերությանը

գնումների գործընթացին մասնակցելու իրավունք չունեցող մասնակիցների ցուցակում ներառելու հիմքերը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 02.12.2019թ. թիվ 26/26-1/19965-2019 գրությամբ «Բայազ Էներգոչին» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված
բողոքներ քննող անձ՝



ԳՐԻԳՈՐ ՆԵՐՍԻՍՅԱՆ